

Institusi kekeluargaan perlu bantu anak yatim

April 9, 2022 @ 11:18am



Raja Muda Perlis, Tuanku Syed Faizuddin Putra Jamalullail

KANGAR: Institusi kekeluargaan perlu proaktif dalam membantu anak yatim merangkumi aspek perlindungan, pendidikan, kewangan dan kebajikan, sejajar dengan tuntutan agama.

Raja Muda Perlis, Tuanku Syed Faizuddin Putra Jamalullail, bertitah golongan itu adalah pewaris generasi akan datang, seperti kanak-kanak dan remaja lain yang memerlukan perhatian serta sokongan dalam membentuk masa depan.

"Sehubungan itu, besar harapan beta untuk melihat institusi kekeluargaan dan masyarakat, berganding bahu dalam usaha berterusan menyokong anak-anak ini dari pelbagai sudut khasnya kasih sayang, kebajikan, pendidikan dan kewangan," titah baginda menerusi satu kenyataan yang dikeluarkan Majlis Agama Islam dan Adat Istiadat Melayu Perlis (MAIPs) hari ini.

Baginda bertitah demikian ketika berkenan berangkat menyantuni anak yatim daripada Kariah Kota Raja Arau di Masjid Negeri Arau petang semalam.

Tuanku Syed Faizuddin Putra yang juga Yang Dipertua MAIPs, berkenan menyaksikan penyerahan sumbangan daripada masyarakat berjumlah RM20,000 kepada empat Rumah Kebajikan Anak Yatim di Negeri Perlis, disampaikan oleh Ketua Pegawai Eksekutif MAIPs Mohd Nazim Mohd Noor kepada Pengarah Jabatan Kebajikan Masyarakat Negeri Mohammad Hazam Ismail.

Di akhir program yang sama baginda turut berkenan menyaksikan penyerahan van jenazah sumbangan Syarikat Ummul Travel And Tours Sdn Bhd bagi kegunaan Masjid Negeri Arau yang diterima oleh Imam Besar Negeri Ustaz Ahmad Sirajuddin Abdul Satar. – BERNAMA